



Misigissutsikkut ikiuigasuartarneq pillugu apeqquteqaat aallaavigalugu oqallinnissamik siunnersuut
(Inatsisartuni ilaasortaq Doris J. Jensen, Siumut)

Qujanaq Inatsisartunut ilaasortaq Doris J. Jensen siunnersuummut.

Kræftimik nappaateqarneq imaluunniit allamik ulorianartumik inuunnermillu ulorianartorsiortitsisumik nappaateqarluni paasitinneqarneq napparsimasumut qaniginerpaasanullu annertuumik eqquisarpoq. Isumakuluutit imaaginnavittarput annaasaqarnissarlu annertuumik ersissutigineqartarluni. Paasinarpoq, inuunermik allanngortitsisumik paasitinneqarneq aamma eqqarsartaatsimut sunniuttarmat. Tamanna tamanut atuutigunarpoq. Ingammik artornassaqaq, tamakku saniatigut ilaqtat qimallugit illoqarfimmut allamut aallartariaqarneq, imaluunniit ajornerusoqartillugu nunamut allarluinnarmut aallartariaqartarneq.

Taamaattoqartillugu naleqqulluinnassaaq, napparsimasutut imaluunniit qanigisaasutut misigissutsikkut ikiorneqarsinnaaneq tarnip pissusaanik immikkut ilisimasanimmit oqaloqateqarnikkut imaluunniit assigusumik allanik eqqarsartaatsikkut ikiorneqarnissaaq. Misigissutsikkut ikiorneqannginnerup kingunerlutsitsinermik kinguneqarnissaa ilimanarpoq imaluunniit eqqarsartaatsikkut arlaatigut ajornartorsiuteqalernermik.

Demokraatit tamanna tunngavigalugu siunnersuuteqartup iliuuserinialersaagai isumaqatigilluinnarpaat, tassalu misigissutsikkut ikiuigasuarnermik neqerooruteqarsinnaalissasugut napparsimasunut aammalu qanigisaasunut. Pisumi tamanna iluaqutaassaaq aammalu ungasinnerusumut iluaqutaassalluni.

Soorunami nuannaarutigaarput, Københavnimi kalaallit napparsimasut angerlarsimaffianni tarnip pissusaanik immikkut ilisimasalimmik ikioneqarnissamik neqerooruteqarmat, danskit aningaasanut inatsisaannit aningaasalerneqartumik. Taassumali napparsimasut qanigisaasullu maani nunatsinni uninngasut ikiorsinnaanngilai. Taassuma saniatigut allatut ajornartumik innuttaaqatitsinnut napparsimasunut annertunerusumik akisussaaffimmik tiguisariaqarpugut. Danmarkimit ikiorneqarneq attanneqarsinnaanngilaq. Uagut nammineersinnaasariaqarpugut

Demokraatiniit arlaleriarluta Naalakkersuisut isornartorsiortarpagut Peqqinnissaqarfimmi suliniuteqannginnerat pillugu, unalu aamma ajoraluartumik taakkununga ilaavoq. Naalakkersuisut oqaannarput, ullumikkut suut periarfissaanersut, namminnerli suliniuteqarnerminnik annississanatik. Tamanna ajorluinnarpoq. Taamaattumik manna iluatsillugu Naalakkersuisut ima apererusuppakka:

Naalakkersuisut akissuteqarnerminni allapput, kalaallit napparsimasut angerlarsimaffianni tarnip pissusaanik immikkut ilisimasalimmik ikioneqartarnerup misilittagaqarfineqarnera nalilersorusullugu, tamanna ilisimasaq siunissami pilersaarutinut atornerqarsinnaaniassammat. Paaserusuppara, suut pilersaarutit tigussaasut Naalakkersuisut pineqaat aammalu eqqarsaatigineeraat?



Taakku saniaigut Naalackersuisut allapput ukkatarissallugu pingaartuusooq, innuttaasut qanoqriliorsinnaanersut imminnut tapersersornissamut ikiornissamullu. Ataqqinnillunga, isumaqanngilanga, akisussaaffik taama annertutigisoq innuttaasunut ajanneqassasoq. Isumaqarpunga, akisussaaffik Naalackersuisuniittoq, isumaqarpungalu, Naalackersuisut akisussaaffik taanna ilumooruttariaqaraat.

Taamaattumik pisariaqartippara paasissallugu, Naalackersuisut qanorpiaq suliniutinik aallartitsiniarnersut maani nunatsinni napparsimasunut qanigisaasunullu misigissutsikkut ikiuigasuarnerup qulakkeerneqarnissaanut?

Tassalu Demokraatit oqallinnermut isummersuutaat.